

## **PROTOKOL**

**između**

### **Državnog odvjetništva Republike Hrvatske i Tužilaštva Bosne i Hercegovine o saradnji u gonjenju počilaca krivičnih djela ratnih zločina, zločina protiv čovječnosti i genocida**

Državno odvjetništvo Republike Hrvatske i Tužilaštvo Bosne i Hercegovine (u daljem tekstu: učesnici),

izražavajući obostranu spremnost za unapređenjem saradnje na području krivičnog gonjenja počilaca krivičnih djela ratnih zločina, zločina protiv čovječnosti i genocida (u daljem tekstu: ratni zločini),

uzimajući u obzir činjenicu nezastarijevanja krivičnih djela ratnih zločina i važnost privođenja pravdi počilaca krivičnih djela ratnih zločina te u tom kontekstu potvrđuju spremnost za unapređenje međusobne saradnje i razmjenu podataka u vezi s krivičnim djelima ratnih zločina počinjenim na državnom području dviju država,

uvažavajući prava žrtava i smatrajući da je zajednički cilj učesnika privođenje pravdi odgovornih za počinjene ratne zločine,

uvjereni da će unapređenje neposredne saradnje, razmjena dokaza i drugih dokumenata i podataka doprinijeti zajedničkim interesima učesnika i saradnji dviju država na području pravosuđa te efikasnijem istraživanju, dokazivanju i kažnjavanju svih počilaca krivičnih djela ratnih zločina,

uzimajući u obzir da Ugovor između Republike Hrvatske i Bosne i Hercegovine o izručenju, potpisan u Zagrebu, 28. novembra 2012. godine, ne dopušta izručenje vlastitih državljana zbog krivičnih djela genocida, zločina protiv čovječnosti i ratnih zločina, te u tom kontekstu smatrajući da se razmjenom dokaza i saradnjom u daljem prikupljanju nužno potrebnih dokaza i podataka može ostvariti cilj da počinioci ratnih zločina budu privedeni pravdi i kažnjeni,

saglasili su se o sljedećem:

#### **PODRUČJE PRIMJENE**

1. Na osnovu ovog Protokola, Državno odvjetništvo Republike Hrvatske može dostavljati Tužilaštvu Bosne i Hercegovine podatke i dokaze o postupcima za krivična djela ratnog zločina počinjena na državnom području Republike Hrvatske ili Bosne i Hercegovine, čiji počinioci imaju državljanstvo Bosne i Hercegovine ili dvojno državljanstvo i koji imaju prebivalište u Bosni i Hercegovini.

Na osnovu ovog Protokola, Tužilaštvo Bosne i Hercegovine može dostavljati Državnom odvjetništvu Republike Hrvatske podatke i dokaze o postupcima za krivična djela ratnih zločina počinjena na državnom području Republike Hrvatske ili Bosne i Hercegovine, čiji počinioci imaju državljanstvo Republike Hrvatske ili dvojno državljanstvo i koji imaju prebivalište u Republici Hrvatskoj.

2. Saradnja u razmjeni dokaza i drugih podataka u predmetima ratnih zločina iz tačke 1. ovog Protokola moguća je tokom cijelog krivičnog postupka, sve do donošenja pravosnažne odluke nadležnog suda države učesnice.

#### NAČIN RAZMJENE OBAVJEŠTENJA O DOKAZIMA I DRUGIM PODACIMA

3. Učesnici će u roku od tri (3) mjeseca od dana potpisivanja ovog Protokola međusobno razmijeniti početne podatke o predmetima iz tačke 1. ovog Protokola, u kojima namjeravaju dostaviti podatke i dokaze, kako bi se utvrdilo postojanje dvojnog državljanstva osumnjičenih, odnosno optuženih ili okrivljenih osoba te njihovog prebivališta.

U slučaju naknadnog otkrivanja počinioca/počinilaca, ili naknadnog utvrđivanja dvojnog državljanstva ili prebivališta, učesnici će u roku od tri (3) mjeseca od dana saznanja o počiniocu/počiniocima, o tome obavijestiti drugog učesnika.

4. Nakon razmatranja početnih podataka i obavještenja, učesnici će sukcesivno dostavljati jedni drugima kopije dokaza iz spisa po redoslijedu prioriteta koji usaglase glavni državni odvjetnik Republike Hrvatske odnosno, glavni tužilac Tužilaštva Bosne i Hercegovine, radi donošenja odluke o poduzimanju krivičnog gonjenja.

5. Glavni državni odvjetnik Republike Hrvatske odnosno, glavni tužilac Tužilaštva Bosne i Hercegovine, može na osnovu vlastitih saznanja zatražiti dostavljanje kopija spisa i druge dokumentacije u vezi sa krivičnim djelima navedenim u tački 1. ovog Protokola.

#### OBLIK I SADRŽAJ ZAHTJEVA ZA DOSTAVLJANJE DOKAZA

6. Nakon uvida u obavještenja, dokaze i druga pismena i podatke, nadležno državno odvjetništvo odnosno, glavni tužilac Tužilaštva Bosne i Hercegovine, može provesti potrebne procesne radnje koje su neophodne za obavješćavanje o odluci iz tačke 7. ovog Protokola.

7. Nakon razmatranja kopija spisa, podataka i dokumentacije, učesnik će u primjerenom roku pisano obavijestiti drugog učesnika o svojoj odluci o poduzimanju gonjenja, te dostaviti zahtjev za dostavljanje dokaza u konkretnom predmetu.

8. Pisano obavještenje iz tačke 7. ovog Protokola dostavlja se glavnom državnom odvjetniku Republike Hrvatske odnosno, glavnom tužiocu Tužilaštva Bosne i Hercegovine. U obavješćenju se može naznačiti koja dokumentacija se traži u originalu ili ovjerenoj kopiji, koje se provjere traže prije dostavljanja dokaza i okvirno vrijeme u kojem dokaze treba dostaviti.